

AI lectur

Objektyp: **Preface**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **7 (1933)**

PDF erstellt am: **20.07.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

AL LECTUR

Dapí ils 7 onns che nies calender „Il Glogn“ fa ses viadis sin sendas e trutgs, tras vitgs ed uclauns ei quei adina daventau senza grondas rueidas propagandistas davart las gasettas romontschas. Mo perquei eis el tuttina ius siu pass temprau e vegnius mintg'onn pli lunsch entuorn, ensivians ed engiuviars.

Era uonn ha quei amitg dil pievel romontsch priu la via sut ils peis e viagescha ussa tras nossa biala tiaretta. Essend che quei amitg de nossas casas grischunas ha priu cun el in dils pli gronds ed interessants umens de nossa Surselva — in miert, che schai gia 100 onns en fossa, mo ch'enconuscha aunc oz mintga via e trutg, mintga vitg ed uclaun, mintga valetta e crestatsch, mintga pez e glatscher ed era il pievel de nossas tschien e tontas vals — sche vegn siu viadi ad esser aunc pli ruasseivels e quiets ch'ils onns vargai. Mo persunter vegn el a raquintar a nossas famiglias romontschas ton pli bia ed interessant dil pader, che pelegriescha cun el da casa tier casa.

Il Glogn 1933 ei dedicaus entirs ed entratgs al centenari della mort de P. Placi a Spescha (†1833—1933) e quei sin tala moda e maniera. ch'el porta el medem temps: recreaziun, instrucziun e variaziun. Als circhels scientifics en ed ord la tiara ei pader Placi a Spescha enconuschents dapí ils anno 70, mo a siu agen pievel romontsch eis el aunc oz, 100 onns suenter sia mort, ton sco nunenconuschents.

Da tut las periodicas romontschas, dallas gia spardas ed aunc existentas, eis ei stau buc ina solia deno „il Glogn, Calender romontsch per 1867“ (pag. 27—32, Glion, 1867), che havessan seregurdau da quei um veramein grischun. Quei factum ha stimulau nus de seregurdar da quei patriot zun meriteivel. Denton sincerein nus, che quella regurdientscha centenara dueigi buc esser mo ina canzun de laud sillas ovras dil pli grond benedictin sur-silvan. Na, quei ei buc e sa buc esser il senn d'in centenari. Orda *nusez*, orda *nies* temps dueigi quella personalitad saver vegnir respectada e venerada; enten *nus*

e viden en *nies* temps, dueígi la glisch creativa de quei genius sclarir, sche nus insumma — e quei ei la damonda de conscienzia de mintga centenari — sche nus insumma stein aunc en relaziuns spirtalas e fructificontas cul vargau ed il vargau cun nus.

La principala ovra, ch'ei vegnida screta sur P. Pl. a Spescha ei comparida 1913, dals auturs Dr. F. Pieth, Dr. P. K. Hager e P. M. Carnot. Quella e las scartiras de P. Pl. sez, ein stadas nossas principalas fontaunas. Mo nus vuessan haver punctuau, che scadin dils colaboraturs, sco era il redactor, *han prestau atgna lavur e buca mo translatau*. Il contegn dil Glogn 1933 vegn a mussar quei clar e bein.

A nos quater amitgs e colaboraturs: Sur G. B. Sialm, Sur Placi S. Giger, prof. Dr. Berther ed a prof. Dr. Iso Müller O. S. B., era en quest liug nies pli sincer engraziament per lur distinguidas lavurs.

Ei resta a nus aunc l'emperneivla obligaziun de medamein engraziar cordialmein alla firma Benteli A. G. Bern-Bümpliz, per l'amicabladad, ch'ella ha mussau de regalar a nus 5 clischés de nos maletgs e de dar ils auters 8 encunter ina fetg pintga bonificaziun. Ei gl'ei quei la ludeivla firma, che ha publicau 1913 la voluminusa ovra: P. Pl. a Spescha. Da Pieth, Hager e Carnot.

La redacziun.